



## **Fundacion Autismo Aruba ta sera 'luna di Autismo', cu un contribucion di studiantenan di IPA.**

Fundacion Autismo Aruba ta mira atras cu hopi satisfaccion riba e reaccion di comunidad Arubano riba diferente actividadnan y informacion concierne esnan cu ta biba cu Autismo durante e 'luna di Autismo'. Awor cu a yega fin di luna di April, e luna di Austimo, e fundacion ta sumamente contento cu sosten cu a ricibi y ta cla para pa sigui brinda ayudo na esnan cu ta biba y trata cu personanan cu Autismo na Aruba.

Durante algun aña caba Fundacion Autismo Aruba ta colabora cu IPA, kende ta haci petishon na e fundacion pa yuda nan studiantenan cu ta drenta nos sistema di educacion despues di nan estudio, cu informacion tocante educacion na muchanan cu Autismo of esnan cu ta den proceso di señalamento.

Tabata na fin di 2010, cu studiantenan Francin Krozendijk y Annemarie Navas a aserca FAA cu un idea pa yuda mehora e comunicacion entre mayor y docente di muchanan cu Autismo na Aruba. Fundacion Autismo Aruba a ricibi e proyecto aki agradecidamente y cu entusiasmo a spera riba resultado di e colaboracion cu e studiantenan. Ya tabata tin un indicacion di e necesidad vocifera pa mayornan y docentenan pa tene discussion fructivero, sin laga emocion of cansancio domina palabracionan.

E importancia di tin un bon comunicacion entre scol y mayor ta significa hopi pa un mucha cu tin necesidad special. Un bon colaboracion entre docente y mayornan ta ideal, y por hasta por ehempel usa comunicacion por escrito pa tene contacto regular. Preguntanan clave y e tono cu e mayor ta usa por determina hopi biaha con e reaccion di e docente lo ta y cuanto informacion e ta duna. Cada partido mester tene cuenta cu diferente factornan, manera orario di tene e combersacion of atencion y interes di otro. Discuti na un manera sano ta necesario si kier yega na un bon plan pa e mucha cu Autismo y su educacion.

A acumula un lista di tips facil y a publica esakinan den forma di brochure, cual por download pronto via [www.autismoaruba.org](http://www.autismoaruba.org) of pa medio di copia obtenibel na oficina di FAA, Irenestraat 21. Tambe pa acompaña e informacion, e studiantenan a traha un poster cu ta consisti di pictogram; un tecnica cu ta pa personan cu Autismo cu ta permiti e informacion ta mas estructura y reglanan ta bira mas claro.



Mayornan y docentenan por aplica e informacion valioso aki den diferente situacion. Un pictogram ademas ta yuda tur mucha, pues no ta solamente pa esnan cu tin un yiu of alumno cu Autismo. Pa mas informacion of sosten den e proceso di traha plannan di educacion pa muchanan cu Autismo, por tuma contacto cu FAA na 5881179.

Un danki ta bai na Francin Krozendijk y Annemarie Navas, kende a dedica nan tempo na crea un herment valioso pa mayornan y docentenan. Nos ta desea e studiantenan hopi exito den e etapa final di nan estudio y ta spera di topa nan pronto como profesional den nos sistema di educacion!